

穆

堂

初

稿

穆堂初葉卷第四十

臨川李紱巨來

劄子表

賀平定青海劄子

奏爲西師大捷普天同慶恭劄稱

賀事切惟我

國家德威廣大超乎前古天覆地載莫不尊親比因準噶爾策妄阿拉蒲坦自作不靖擾哈密

聖祖皇帝命將出師平定西藏收功萬里爲振古之所莫及準噶爾旣已震懼屢申款塞之求漸有銷烽之慶乃羅卜

藏丹津世受

國恩近在藩服素懷首鼠遂肆鴟張我

皇上聖武布昭知人善任廟算無遺別遣將帥大申賞罰六
師用命半月成功數千里之間星馳電擊旣獲其母又
繫其孥脅從之蕃回悉皆歸順助亂之台吉悉皆生擒
羅卜藏丹津隻身亡匿死不旋踵擴無疆之邊境樹不
世之鴻休從此內治則外寧邇安則遠至將見準噶爾
聞風喪魄歸命之誠愈固邊關之警永清四海臣民歡
欣踴躍臣奉使在外不得與在廷臣工同列拜舞用敢
繕劄恭

賀少申歡忭之私臣謹
奏

請將糶三贏餘修理廣西城垣劄子

奏爲設法修理城垣以固邊方疆圉事

臣蒙

聖恩委任封疆重寄無日不以寧謐地方爲心而廣西東界高廉瀕海之地西連雲貴苗獠之區北控湖南有湖山之險南通交趾有中外之防而內境六十州縣獠獍雜居四十九土司盜賊出沒在

國家大化翔洽海晏河清固無伏莽之戎而民人社稷倉庫錢糧咸倚城垣爲重此王公設險之至意也臣入境時見全州城垣十坍七八及抵任閱城亦有數處損缺隨經行查各府復經提臣韓良輔亦以咨請設法捐修

城垣移行到臣按查九府所屬共倒塌城牆垛口一千

六百餘丈城樓五十八座砲臺三座又有西林鎮安俱

係土城西隆一州並無城郭若欲全修需銀三四萬兩

廣西本無公用之項臣到任後司道府俱革去節禮州

縣亦減輕火耗實無捐修之力現在惟鎮南大關緊控

交趾爲貢使出入之地公同竭力捐修外其餘工費浩

大計無所出再四思維有可以不動錢糧而盡修九府

六十州縣城垣者惟倉穀糶三一端臣查糶三之法現

遵

功令通行糶三之內應有贏餘糶三之時穀價必貴收買

之時穀價必賤即使減價而糶平價而收出入之間每石尙可餘銀五六分糶三之法久行而未聞以此辦公事者或州縣侵蝕或上司分肥止知私橐不念公家故耳今廣西常平倉穀四十餘萬捐穀一百一十餘萬又兵米支剩存貯亦十萬有零以米一穀二計之連常平捐納二項實共穀一百七十八萬十糶其三當糶穀五十三四萬約計可餘銀三萬兩若以此項銀兩爲修城之費則不動庫帑分厘而可使九府六十州縣之城牆城樓砲臺堞口煥然一新矣如蒙

皇上俯允批行再行補

穆堂初藁

卷之四十

題聽候部議但部文知照到粵之日農事已忙應俟雍正
一年冬間修築此事因屬創始恐愚昧籌畫未當先行

繕劄

奏陳伏乞

皇上睿鑒批示施行

臣謹

奏

由永定河還

朝謝

天恩

臣李

紱

謹奏爲恭謝

天恩事切臣一介寒微遭逢

聖祖仁皇帝殊恩優擢由編修特陞庶子歷陞內閣學士兼禮部侍郎都察院左副都御史因典辛丑會試舉子曠闕革職永定河効力隨將家中房產書籍賣銀六百餘兩捐修莽牛河隄產盡力竭請工部行查本籍餘產止值銀二十四兩無可變賣工部續加駁查俱經撫臣咨覆

臣正切悚惶無力可効本月二十五日辰刻工部傳奉
聖旨將派出永定河富戶李紱着離富戶來京另有用處欽
此到臣聞

命自天感恩無地臣草茅下士愚陋迂疎旣蒙

聖祖仁皇帝不次擢用於前茲待罪河干復蒙

皇上委曲生全於後捐糜頂踵

高厚難酬恭詣

闕廷叩謝

天恩惟有子子孫孫銜結無窮而已臣謹奏

請截漕遞運劄子

臣請

奏爲通融漕船抵通之法以甦漕困事切臣奉

旨催漕留心體訪數年以來因漕船回空凍阻旗丁每歲多
費銀數百兩破產不足益以兒女苦累難言深可憫惻
且丁旣困憊或悞漕運關係

國家甚大攷古來轉運之善推唐臣劉晏屢之爲法淮汴
河渭水次各立倉廩以次遞運每歲漕粟數百萬石而
民不困蓋長運之勞不如遞運之逸舟行於本河則險
阻俱習民役於本境則時日無多所爲法良而意美也

國家漕法因元明之舊自南至北並用長運然自淮安以至濟寧自濟寧以至天津爲時尚早長運可行惟天津至通州溯流而上時日又遲而北方之河秋冬水涸江南浙江地近船小八月以前或能抵通若江西湖廣並有長江之險湖南與江西并有彭蠡洞庭大湖阻隔地遙舟重抵通常在深秋以遠地重船溯枯竭之流三百餘里動需逾月回空凍阻勢所必然臣愚以爲今雖未能全用晏法而自津抵通似可昉其意而行之

國家舊於天津建南北二大倉雖不爲遞運而設而修而廣之足爲遞運之用且北河起剝自昔爲然從前通州

武清等五州縣因地畝派剝設泓剝船六百號專爲剝
淺之用每米百石旗丁止給飯米五斗後因泓剝船軍
盜米州縣憚於比追原任倉場總督石文桂

題請革除其地畝銀兩並解坐糧廳發給旗丁自僱剝船
每丁止給銀一二兩或將此銀扣作茶菓起欠之費今
六百名泓剝軍坐享安逸而旗丁僱剝苦累無窮不肖
吏胥通同民船齊幫勒索每米百石勒銀五六兩又勒
飯米二石耗米二石約費銀九兩餘查自津抵通商民
裝載貨物每百石止用銀四五兩而旗丁剝糧費乃加
倍一經凍阻須次年冬月始歸又加費數倍明年新運

僱募民船又加費數倍若打造舨船則加費五六倍查北河起剝每船十剝其九與遞運無殊而無窮之累獨歸旗丁勢所難支法宜稍變請將湖南江西尾後十數幫分遣監督數人覓就天津露囤收貯仍復立泓剝船陸軍俟明年河水深通之時原收監督發米交泓剝船陸續運至京通各倉仍令原監督自行收兌一面建倉以備春來雨水至泓剝船久廢應令旗丁照商民腳費每米百石出銀五兩交官給泓剝軍買備船隻貧不能出者官庫代給仍於旗丁明年行糧照數扣除如謂船隻急難買造則浙江江西現有打造之舨船及湖廣僱募

之民船並堪轉買其修建倉廩費無所出則現有每船
茶葉銀十兩雖屬無名陋規今歲擬取爲建倉之用亦
旗丁所樂輸將來每歲修理爲費無多卽此項亦可以
次減除貯米有其地運米有其人

國家無絲毫之費而漕法有無窮之利遠地重船不至凍
阻近地民船無從勒索明年新運不憂遲誤寓遞運於
長運之中臣以爲亟宜通融者也今臣所催漕船尾幫
已過靜海距天津止一百里而北河水淺起剝遲緩前
船頂幫首尾相銜無可催攢尾後十數幫必仍凍阻年
復一年漕法終非盡善欽惟

皇上聖明諄諄以回空凍阻爲愛

臣泰奉

命催漕輒敢冒昧陳

奏倘可施行伏祈

睿鑒勅部速行議覆

臣謹

奏

報明米色米數劄子

臣某謹

奏爲圓米事竣報明米色米數仰祈

睿鑒事

臣奉

旨於天津截留湖南等九幫漕糧覓行囤貯其軍船四百五十六隻所載米三十萬零五千二百餘石俱於本月十二日起完囤好其船盡數回南業經繕摺

奏聞外所有舨船一百九十六隻所載米十二萬六千七百餘石亦於十七日盡數起完囤好所起米色俱係乾潔好米舨船所載色微變者亦爲數無多惟南昌前幫

旗丁朱戈朋等二十二船所載永新峽江二縣漕米紅白參差顏色黯淡據該運官劉世琰詳稱江西水次裝米之時因米色不佳卽與旗丁稟明糧道蔣曰廣不願領兌糧道將旗丁細打勒令領收過淮時旗丁又經稟明總漕等語隨將各船樣米咨送倉場核奪其二十二船俱係軍船難以停攔恐致陳阻有悞新運將米另行起囤催令船隻回南今准倉場咨覆米色霉變不便收放等因前來臣查漕務積弊州縣米色不佳賄囑糧道抑勒旗丁領兌者向來有之今二縣米共二十二船若謂旗丁看護不謹斷無二十二船俱怠玩之事若謂旗

丁私行攙換斷無二十二船俱奸狡之人明係該縣本來米色不堪相應請

旨勅令倉場總督等將現在樣米佑定成色俟明春水開啓
回運米之時照成色變價其不足色之數自下卽行文
江西令原任糧道蔣曰廣及永新峽江二知縣分賠補
足成色庶劣員知警而

國課無虧矣倘可施行伏乞

皇上勅部議覆至於所起米數旗丁等感激

天恩各船全完除失風濫米應照例變價買補外惟贛州旗
丁因舡船板薄船底濕壞米色每船約數十石不堪收

國亦自願於明春運米之時買補全完其餘各幫船隻
間有短少臣遵定例准其以應給之三升八合回空飯
米照抵再有不足卽令買補俱升斗不欠臣謹

奏

條奏武闈積弊劄子

臣謹

奏爲條陳武闈積弊事

臣蒙

天恩陞補兵部目下武闈伊邇所有利弊臣昔兩典武會試頗識其端敬爲

皇上陳之一好字號宜清其積弊也康熙五十三年臺臣李景迪條陳武會試於頭二場分立好字號原欲得弓馬技勇之材日久弊生漸成利竇查頭二場監箭俱屬王公大臣斷無徇私作弊之理然武舉人衆所取好字號不能盡記姓名比至取定號冊咨送兵部常在十三日

夜深兵部卽據號簿印定卷面以應十四日發給武舉倉猝之頃無暇校對奸胥串同監箭家人添改原簿闌中止據卷面好字號印子及所註弓馬技勇以定高下去留放榜之後再加訪察則好字號多非圍場所定馬步箭或增少爲多技勇亦改小爲大以

國家良法美意供胥役作奸之具深可歎恨

臣

請嗣後武

闈頭二場監箭之時大臣面先好字註明號簿監試御史亦於號簿一樣註明每日將歸再加校對各自收執二場及射帽頭亦照此法使家人胥役無由添改至頭二場及射帽頭務於十二日內全完十三日早監箭大

臣及御史將號簿彼此校對親交兵部堂官按簿印消卷面以好字號之去取聽之監箭大臣以好字號之虛實責之監試御史庶幾得弓馬技勇之實材而好字號不爲虛設矣一好字號宜寬取其數也查弓馬技勇止可拔戰將之材而大將之韜鈴智略全於策論見之今武會試新例務儘好字號取中如好字號不足中額然後於照常合式卷內補足額數在監箭大臣恐以濫取致咎常以嚴刻示公所取好字號較各省中額多者止逾數名少者僅足相當及至三場閱卷其列在好字號者文雖不通亦強取以足額其不在好字之列者文雖

甚工亦割棄而不收是全以弓馬技勇取人而策論幾
爲贅設何不令其卽以行伍出身而必多此制科之舉
濫此進士之名且好字號爲數旣狹取一好字號卽可
得一進士在吏胥之撞騙索價愈高而武舉之鑽營多
金不惜其爲弊也甚大臣查各省取中之數雖係臨時
請

旨欽定然較之前科多寡不甚相懸請令監簡大臣頭場所
取好字號較前科中額必三倍其數二場及射帽頭以
次核減至加兩倍而止務留餘地使闈中策論可以斟
酌去取如好字號已兩倍於中額其中佳卷猶難足數

卽於照常合式卷內擇尤佳者取中庶幾不識丁之武夫無由濫與而精韜鈴之才士不致屈遺矣一好字號之策論宜杜其僱倩也人材之生兼長爲難便弓馬者或不工於文藝工文藝者或不便於弓馬今取中者必於好字號而好字號取數甚隘於是列在好字號者有命中之心不惜重賄以求策論而不在好字號者無中式之望止圖賣文以資歸裝或聯號或換卷紛紛僱倩主司止憑文取錄而文出他手無由致詰卽使頭二場無弊其所取者猶爲拳勇粗材倘併頭二場實緣則所取者不過富家市井此中欲求將材百難得一臣請於

武舉領卷入場之時令巡綽官卽押歸號舍毋許徘徊
觀望得以換卷至天地元黃宇宙洪荒八字號舍令好
字號之卷編坐其照常合式之卷悉編坐於寒來暑往
以下而日月盈昃辰宿列張八字號則虛而不編務令
好字號與不列好字號者彼此號舍隔絕不得通同鬪
文則所取之策論無倩代之弊而所取之人材無冒濫
之虞矣臣爲

國家人材起見因武闈期迫不及待輸

奏之班先行

奏聞伏乞

皇上睿鑒施行

臣謹

奏

謝

賜御製朋黨論劄子

題爲領到

御製恭謝

天恩事雍正二年九月二十六日准兵部咨開職方清吏司
案呈雍正二年七月二十五日多羅果郡王奉

旨御製朋黨論各省將軍總督總河總漕巡撫提鎮等每人
各賞給扇面連四紙裱的一張副都統布政按察副將每
人各賞連四紙的一張將軍總督總河總漕巡撫提鎮副
都統布政按察副將每人賞給滿漢朋黨論各一本在乾

清門賞給各大人朋黨論時將所下上諭一併發給所賞之書俱着交與內閣有便人發去欽此今准內閣交出令兵部頒發前來應將所奉

上諭抄錄并賞給之朋黨論頒發各省督撫布政按察提鎮副將一體收領欽遵可也爲此合咨前去轉行布按二司一體欽遵施行等因計發抄錄

上諭一道

御製朋黨論滿漢書共六本扇面連四紙裱的一張連四紙

的二張到

臣臣

謹出郊跪迎至

臣

衙門恭設香案望

闕叩頭謝

恩祇領隨卽賫送布按二司一體欽遵收領并臣恭摺

奏謝外欽惟我

皇上聖學高深天心仁愛屢頒謨誥用啓迪乎臣工

特加訓詞絕偏私於朋黨推周易渙羣之象先天之數不違
原魯論不黨之言後聖之揆必合傳人臣識致身之義
雖在父母猶將移孝以作忠庶王臣得匪躬之宜雖有
友朋不敢背公而廢法從此凜敷言於

皇極咸是訓而是行躋斯世於大同永無偏而無黨皇哉
帝典肅矣臣箴銘骨欽遵恭疏

題謝伏乞

皇上睿鑒施行

賀七政同躔劄子

奏爲七政同躔普天共慶恭申

賀悃事

臣竊以

聖人在上與日月同其明

皇極建中則星辰順其序蓋

位乎天德故先天而不違

協乎天心故後天而奉若瑞徵懸象慶洽寰區欽惟我

皇上

光被四表

明並三辰

聰明睿知而旁燭無遺

文武聖神而於穆不已

朝而乾夕而惕憂勤上配乎天行畢之雨箕之風好惡下孚於民志蓋

聖以繼聖若相推而代明乃安愈求安比宿離之不忒於是天心感格兆以奇祥曆數深微忽逢嘉會值三陽開泰之後正二月中和之辰日月如合璧之形五星有連珠之象萬方有衆同瞻

協帝之華振古無前罕見光天之瑞雖聚於東井會於降婁曾登漢宋之史而時值春陽日臨營室惟聞顓頊之年

蓋

聖德非三代而下所可幾故休徵歷四千餘年而再見乃猶
本有善歸親之義推原於

聖祖之聖德神功而揆以

大孝格天之心愈以下

國家之重熙累洽從此

敷之政事體繼照以無私書在簡編俾九歌而弗壞臣幸
際邽隆之運敬申抃舞之誠荒服瞻

天喜七政同躔之瑞華封祝

帝頌萬年有道之長

正麗重離恒得天而久照

恩周分野永應地以無疆

臣

無任踴躍懽忭之至謹具奏

聞

頒賜

聖諭廣訓謝

恩劄子

奏爲欽奉

上諭事雍正三年四月十一日臣賁摺家人回粵賁到兵部
咨文一角內開職方清吏司案呈准內閣交出雍正三
年二月十八日莊親王果郡王傳

旨賞王大臣八旗各省將軍督撫等官

聖諭廣訓刻本清漢字共一千六百零二本交內閣分給仍着
各督撫重刻頒發通行欽此交發到部相應將漢字書二

百四十五本頒發各省督撫布按二司提鎮副將一體
欽遵奉行可也爲此合咨前去欽遵查照施行計發

聖諭廣訓漢字書三本廣西巡撫布政使按察使等因到

臣臣

卽率同在城文武各官親至郊外跪迎至衙門恭設

香案望

闕叩頭謝

恩祇領訖除將恭奉到

聖諭廣訓二本轉賣發布政按察二司併遵

旨卽行重刻頒發隨於十五日親行宣講外欽惟我

皇上學貫天人

功高述作

聖以繼

聖比堯舜而猶賢安愈求安際唐虞而益盛

懸日月星辰之象倬爲雲漢之章

沛風雨露雷之恩迭布上天之教惟

聖祖六十載久於道而化成惟

聖諭十六條敷之言而建極在海宇之太平有象旣服教而畏
神乃

皇上之孝思無窮善繼志而述事洋洋纒纒

廣大訓以萬言蕩蕩巍巍比六經之二典從此萬邦黎獻咸

歸徧德之休百爾臣工共佐誠民之績將

國不異政家不殊俗並躋風同道一之隆而摩之以義漸

之以仁益衍累洽重熙之慶矣

臣謹

奏謝伏乞

皇上睿鑒施行

謝頒到清漢文

上諭謝

恩劄子

奏爲欽奉

上諭事雍正三年四月十一日臣賈摺家人回粵賁到

上諭清漢書各三本併兵部咨文一角內開職方清吏司案
呈雍正三年二月二十九日內閣交出

上諭清漢書共四百八十八本頒發直隸各省督撫提鎮布
按二司副將清漢各一本交出到部相應頒發直隸各
省督撫提鎮布按二司副將一體欽遵可也爲此合咨

前去欽遵查照施行計發

上諭清漢六本布政使按察使各二本等因到

臣臣卽率同

在城文武各官親至郊外跪迎至

臣衙門恭設香案望

闕叩頭謝

恩祇領訖隨將

上諭清漢書各二本分領布政按察二司一體祇領欽遵在

案欽惟我

皇上皇建有極

允執厥中

復旦重華兢業仰符於

聖祖

朝乾夕惕憂勤上協於天行以故成五帝而登三王
德功並懋言世法而行世則

謨訓時宣乃於重熙累洽之餘不忘保泰持盈之意
特頒諭旨用戒臣工

知爲君之獨難時恐一夫之不獲

念爲臣之不易曲成萬物而不遺惟用人與理財盡大學均
平之道必知險而知阻乃乾坤廣大之模臣遠巡南徼
之炎荒屢受

上天之至教從此愚忠勉竭雖何知而思日孜孜深惟

大化彌醇欲仰窺而莫名蕩蕩幸際

明良之會慶千載而一時恭承

教化之勤歷終身如一日在

一人聖不自聖旣憂盛而危明俾百爾臣艱厥臣益率作以

興事卽

化成有道

厝慶無疆矣

臣謹

奏謝伏乞

皇上睿鑒施行

酌定八旗規制劄子

奏爲敬陳八旗規制事竊

臣

在八旗志書館纂修効力八

年於茲八旗事宜稍知一二今復蒙

皇上恩旨命於副總裁內行走聞

命悚惶益加刻厲芻蕘之見有關於八旗志書併有關於八

旗典制者共得四條敬爲

皇上陳之一佐領之名宜酌定也天下籍貫郡縣各有定名
惟入旗籍貫以任佐領之人名之因而一家之中祖孫
父子佐領之名不同一人之身早晚後先佐領之名亦
不同

大行皇帝特旨命編定佐領名號以保合太和萬國咸寧八字
分於八旗令每旗佐領名號上則同用一字則別編二
字法至善也但字義無疵者甚少而入旗佐領將及二
千字不敷用且

國家慶祚綿長佐領日增將來盈千累萬卽罄字書亦恐
未給又有漢文雖異而滿文同者如漢文豐富饒裕滿
文並作巴延漢文康寧安泰滿文並作額爾赫則亦難
於分編以故奉

旨已經三年至今尙未編定而入旗志書首旗分佐領之志懸
筆以待查入旗佐領印記俱稱某甲喇第幾牛衆若依

鈴記直稱爲某旗某叅領第幾佐領則名號未嘗不清
卽增至盈萬亦無不敷之數矣一叅領之次序滿文宜
畫一也臣查叅領漢文自頭叅領至五叅領次序井然
比閱滿文則惟頭叅領稱弗勒甲喇各旗相同至二叅
領以後則參差莫辨有先序兩梅勒次及兩都伯者有
先序左梅勒都伯次及右梅勒都伯者亦有先序右梅
勒都伯次及左梅勒都伯者卽先序兩梅勒者亦有先
左後右先右後左之殊以爲因左右翼而分異同則鑲
黃正白同爲左翼而名次不同以爲因正與鑲而分異
同則正藍與鑲藍正鑲不同而名次相同正白與正藍

同爲正而名次又不同鑲紅與鑲藍同爲鑲而名次亦不同以爲因旗之色而分異同則鑲黃與正黃同爲黃而又不相同覽滿文者竟莫能測其二三四五之次序若確定畫一之滿文則易於辨識矣一軍功授世職之勅書宜定一永存之冊籍也世職承襲不能皆世襲罔替世次襲滿卽將

勅書送部銷繳志書因軍功立傳必遵

勅書而入旗移送寥寥

臣復敬查

實錄史書及滿洲氏族大全原冊逐一增添較之旗冊多十之

五然銷繳遺漏者尙不知若干

臣

請令吏部驗封司議

敘軍功務應存一永久冊籍則將來作史者不患遺漏
矣一滿漢文人名地名必對定畫一漢文也臣修志書
恭閱

實錄史書及六部八旗冊籍同一人名地名往往前後互異一
人疑爲兩人一地疑爲兩地若將滿文單字逐一對出
一定滿文顯示入旗則人名地名不致互異矣以上數
條倘蒙

皇上采擇伏乞

睿鑒施行臣不勝悚息之至謹

奉

條陳用人三法劄子

奏爲請停揀選分發之例寬公罪處分之條專百官職司
之守以收人材之實用事竊惟爲政在人取人以身我
皇上嗣統以來躬行三年之喪以立百行之原朝乾夕惕孜
孜圖治舉用耆舊廢黜僉壬取人以身皇建有極用人
之大本立矣用人之大綱舉矣顧封疆大吏猶有一二
積習未去足以爲害於用人之法者臣敢冒昧陳之我
大行皇帝勵精圖治闢門顧俊正途雜途以至監生生員無不
蒐羅務期野無遺賢以圖天下之治而督撫諸臣未知
聖主愛惜人材之盛心私意揣摩迎合紛紛疏請揀選人員分

發其地以備任使而後選之員亦藉揀選僥倖躁進在
科甲則後科可以壓前科在捐納則後班可以壓前班
廣奔競之門亂銓選之序及至其地缺少人多有候至
四五年不得官者多至羈棲失所甚無謂也且人之材
質中人爲多大約聽上司爲轉移而已其上司貪而已
獨廉上司惰而已獨勤者百不得一也其上司廉而已
獨貪上司勤而已獨惰者亦百不得一焉而九卿之驗
看又不過取辨於俄頃宣陳履歷觀其衣冠應對考驗
夫以衣冠整齊爲賢是謂公西赤賢於曾參也其後至
於租賃衣冠以應揀選則衣冠亦不足信矣以應對敏

給爲賢是謂嗇夫賢於張釋之也其後至於演習履歷以應揀選則應對亦不足信矣且虞廷之治臨下以簡而揀選分發變簡爲煩雍正元年臣任吏部月選州縣多者五六十人少亦二三十人不過月具一疏而月選之事已畢至於揀選分發則一疏變爲百疏每官一員初至委署試用者有疏期滿實授有疏煩簡衝僻試用不宜故爲改調以示察吏之勤又有疏候補者多嚴加澄汰或改教職或送回吏部又有疏每官用三四疏舉從前一月所選數十人一疏可畢者今百疏猶不止也君天下者一日萬幾心餘於事則可以智周萬物心爲

事役則叢脞之弊必生推此一事以例庶政變少爲多則莅事惟煩焦勞彌甚我

聖祖皇帝六十餘年從未揀選分發天下未嘗不治此分發入員之法斷宜停止以省章奏以息奔競而其地庶政煩苛瑣屑者亦推此意稍爲減省庶幾

九重之上政簡心清靜觀其大而羣生無不在宥矣且督撫所以必請揀選分發者殘忍嚴刻矣叅屬吏懸缺多而人員不足用也我

大行皇帝明於庶物察於人倫慎憲省成率作興事蓋

聖人大智因物付物行所無事而督撫之寬愚者妄意揣摩以

嚴刻爲公日以叅官爲事州縣之吏或一歲半歲而被叅或數月而卽逐或一疏而叅十數員或一疏而叅數十員求其實情並多枉抑朝更夕改人地不習官無固志苟且旦暮至於吏胥視官若居傳舍卽有設施玩不奉行其弊若此豈封疆大臣察吏之法哉

天行皇帝嘗召江撫臣布蘭泰責其殘刻乃有仰體

要嚴之對

天行皇帝降旨謂朕聞此言不覺爲之戰慄汗流浹背朕止令臣下秉公何嘗有要嚴之意卽

命接任撫臣查其所叅屬員逐一申理

聖心大公昭如日月而督撫諸臣以多叅屬吏爲秉公者相習成風至今未已夫黜陟幽明治官之典官苟有罪安得不叅惟當辨其過故察其公私凡貪贓枉法實有受賄劣跡者罪雖小而必不可留凡因公註誤或迫於不得已或陷於不及知者罪雖大而不可輒去故曰宥過無大刑故無小蓋六計弊吏以廉爲主故貪贓之吏刻不可容人非聖人不能無過故寬其處分乃可有爲宋臣范仲淹謂當官者私罪不可有公罪不可無誠以畏避公罪則無敢任事者孔子謂觀過可以知仁其論政也以赦小過與舉賢才並稱非赦小過不能舉賢才也今

誠酌定處分之法凡因公註誤降級革職俱許留任三年無過准其開復則居官者勇於任事而可以收久任之效矣夫官惟久任然後事無不習吏不能欺初任則敏者亦難周知久任則拙者亦能自勉近奉

上諭亦旣久任以虞廷之人守一官漢世之吏諄諄長子孫

爲良法矣但非立定章程則秉銓選之職者不知何以

久任

臣

愚以爲在京之官宜令久司一職在外之官宜

令久任一地京官任事莫要於六部凡主事員外郎中

並由本司陞轉陞至郎中果才守兼優亦加以京堂銜

俸俾令久管本司他若六科七道亦由本科本道陞轉

則人習所事更不能欺而部院之務可得而理矣至於
外官親民者莫過府廳州縣貪酷者罪之庸懦者罷之
才品卓異者特拔之其餘中材並以九年爲考滿洲縣
應陞卽陞本府佐貳府佐貳應陞卽陞本府知府知府
應陞卽陞本道雖在中材久於其地則察於民情明於
土俗而循良之治亦可冀焉若謂地有肥瘠缺有美惡
則外官旣已均與養廉之資京官如現在戶部六科均
其飯食之費則人無所揀擇久於其職亦其所樂居矣
夫治天下之道知人安民二者而已而知人尤先於安
民故曰聖人養賢以及萬民賢不可多得而中材皆可

器使今誠循資格以待中材赦小過以求後效專官司以盡職守則天下多可用之才天下皆可守之法卽天下無不安之民矣臣愚昧粗疏無所知識受恩深重不敢不盡其愚如果芻蕘可采伏乞

皇上睿鑒施行謹

奏

請嚴銅禁劄子

奏爲請清銷燬制錢之源以重

國寶以平錢價事本年十一月二十六日欽奉

上諭嚴禁奸徒銷燬制錢以康熙錢文稀少爲銷燬

之證此誠我

皇上至聖至明灼見弊源確然而無可疑者也但嚴禁銷燬之令屢下而奸徒之銷燬如故者固由有司奉行不力亦由銷燬之弊難於查捕非若私鑄者之廣聚徒衆有鑪有器一捕而卽得也錢文入銅鋪之鑪卽化爲銅未化之前原係制錢不可得而捕也旣化之後已成廢銅又不可得而捕也惟禁斷打造銅器之鋪則銷燬亦無所用而銷燬之弊不禁而自除矣今現在

功令亦旣嚴禁打造黃銅器皿而銷燬公行錢價不平者止禁黃銅未禁白銅與紅銅也議者以白銅非制錢所用

不知今之所謂白銅皆黃銅也議者以紅銅非制錢所
化不知今之所謂紅銅皆黃銅也銅爲錠鏤煮以藥水
可爲假銀豈不能爲白銅嘉興烘鑪以藥水染之作古
銅色豈不可充紅銅故臣謂今所行白銅紅銅皆黃銅
也或謂現今禁用黃銅器皿則用銅之處甚少不知卽
煙袋一物卽以耗制錢而有餘臣訪聞外間用制錢十
數文打造煙袋一枚卽可賣制錢六七十文在小民嗜
利毫末必爭頃刻取數倍之利有不冒險爲之者乎今
天下不用煙袋之人百不得一猶有一人用數枚者人
之數千萬而無算則煙袋之數亦千萬而無算鼓鑄所

出豈足當銷燬之數哉或謂器用亦有需銅者恐難全
禁不知富貴之家金銀可用士大夫以下錫鐵瓷漆無
不可者必欲廢紛華之好則廣東上錫雲南精鐵備極
華美何必分用鑄錢之銅致滋奸弊臣請自鑄鏡及樂
器而外一切打造黃銅紅銅白銅之舖盡行禁絕犯者
發充邊遠使天下之銅盡歸鼓鑄

國寶流通永無銷燬而錢不可勝用矣臣愚昧之見是否
有當伏乞

皇上睿鑒施行

臣謹

奏

請廣命婦

恩賜劄子

奏請欽奉

恩詔事雍正十三年十二月十四日

恩詔內開一民公侯伯以下二品大臣以上命婦著加恩賜

欽此

臣

母於雍正元年兩遇

覃恩並蒙

誥封夫人循例應賞緞二疋

臣

具領發司旋據司官回稱從前

詔賞命婦止給大臣之妻並未給大臣之母等語

臣

查舊案誠

如所稱

臣

伏思命婦之稱凡婦人曾受

詔命勅命封贈者皆稱命婦非謂臣工之妻受

詔命勅命者始稱命婦而臣工之母雖受

詔命勅命不得稱命婦也況我

皇上孝治天下以尊崇

聖母推恩四海大臣之妻普霑

恩賜而大臣之母乃獨見遺恐未合於

皇上推恩之意況大臣之妻甚多大臣之母甚少倘蒙一體

恩賜在臣工實爲難遇之典

臣

母今年八十有六際此

覃恩尤爲慶幸伏乞

皇上勅旨令臣下之母曾受二品以上封典者與大臣之妻

一體

恩賜則

聖母之恩尤爲普被而

皇上孝思之治亦洋溢四海矣

請停買洋銅劄子

奏爲買銅之官商交困請用滇銅以制倭狡以資鼓鑄事
竊查制錢國寶民生利用戶工二局勢所必須向年派
安徽江蘇江西浙江湖南湖北福建廣東八省委官分
買而入省均非產銅之地惟藉於洋銅於是辦銅道府
羣集蘇州爭買而價昂價昂而數虧叅官至七十五員

欠銅至三百八十七萬甚至私派錢糧人民亦受其累
康熙五十九年江海關監督劉保柱

奏請自任買銅九卿議駁仍歸八省

臣

與原任兵部尙書

白潢等別爲一議請交蘇杭二巡撫委清正大員到船
稱兌布政司庫照價給銀立刻清楚無庸他省委員爭
買致令昂價乃至簡至易之法也當蒙

聖祖仁皇帝俞旨特采後議行之數年頗爲妥適其後江浙巡
撫仍派專員買辦人微地輕又非本管之官洋商刁措
委員賠累又用分省採買之法各省道府仍聚蘇州爭
先購買規免處分率皆預給商銀以祈必得非惟海洋

風波偶有不測則銀銅兩空且事久弊生倭人才狡探知商領官銀勒有年限多立名色挾取不貲每商必領倭照大照索銀二千六七百兩小照亦索取銀一千七八百兩加以租船之費務須一千二三百兩水手夥長舵工總管行商財賦下逮廝役約共一百餘人辛力工食約需銀一千二三百兩出洋之日每船預備二年飯食又需銀一千餘兩官銀出領已虛費五六千兩矣比至日本狡倭才措商貨之價則減前一半倭銅之價則較前加倍貨多銅少官商賠累又近日狡倭叅雜銅色一經部駁賠累益重辦銅之官預令洋商重加鎔化每

百斤須火工銀一兩一錢爲費甚多到部仍然駁減責令洋商賠補者也又近日倭秤減短分兩每百斤約短三斤辦十萬斤者約補三千斤此責令辦員賠補者也二端雖小亦苦賠累現在買銅之官多已破家買銅之商無不傾本官承上委義無可辭商虧前價藉口補苴實皆勉強承辦現在欠銅約百餘萬斤將來日陷日深勢恐難於清楚臣思滇中厥銅歲可得三百八十餘萬斤益以用銅則戶工二局所須但有盈餘斷無不足若將滇蜀二省停其鑄錢所有銅斤照洋銅給與價值令其盡數解部以應二部錢局之用停止採買洋銅則各

省官員無買銅之累

國家錢法無虧本之虞倭人雖狡亦無可施其狹制矣再查日本所產自銅而外不過海參海帶鰓魚微物數種不足與中國綢緞等貨交易而倭人因中國買銅長崎一島每歲抽税金三萬五千片失此重稅必且以銅求售聽商自購則洋銅亦不必派買而自至矣若疑滇蜀錢已開不便停止則從前三三省停鑄已五六十年的非近年銷燬不聞有錢貴之患而雲南目下每銀一兩換大錢一千一百文則錢多可知若謂協濟鄰省之用則廣西浪錢不行已經

奏請停運蓋滇蜀錢局可停照然明白若謂道遠逆艱則
滇銅向來並用牛馬負過貴州再用船隻裝至漢口然
後發行且滇銅自常德而下並泛大川蜀銅自夔至荆
一日千里皆不難於運解即使稍加運費較之洋銅短
虧動數十萬所全亦已多矣停買洋銅止用滇蜀之銅
以供戶工二局之用是否

臣言可采伏乞

皇上睿鑒勅部議覆施行

臣謹

奏

請酌定磨勘試卷人員劄子

奏爲酌定磨勘試卷人員以崇實政事竊查鄉試硃墨卷

向無磨勘之例康熙四十一年壬午科始奉

聖祖仁皇帝特旨命魏象樞李基和等三四人專司其事後因
試卷繁多始令九卿公同磨勘誠

國家慎重求賢大典之至意也日久懈生漸失初意且政
因時設事勢亦殊人文既盛解額遞增倍於往昔直省
中式舉人多至一千三百餘人每人三場則卷近四千
合硃墨卷閱之數及入千九卿辦事之餘日不能完數
卷逾冬越春究難返閱且六部爲政事衙門本無暇於
閱之而試卷浩繁又非旬月可畢至若戶刑二部尤爲
煩冗自晨至暮披閱不停斷無暇磨勘試卷以致近日

禮部通傳有竟日無一人至者甚至將試卷分送九卿
私寓恐或倩代點閱勉強塞責勾當公事非所謂實心
實政也臣再四思維莫若於六部之外擇職事稍簡之
翰林院詹事府都察院三衙門人員專司其事在翰詹
爲文學之臣科道有稽察之責於磨勘試卷最爲親切
翰詹自學士以至編修檢討自詹事以至中允贊善都
察院自左都御史以至六科給事中十三道御史人員
旣多分閫亦易其於磨勘必更精專抑臣更有請者今
科道恭遇十一月二十二日

恩詔內開一鄉已經中式文武舉人除遇犯黜革外其有磨

勘原卷字句以致停科者俱着赦免准其會試欽此欽遵在案夫旣免磨勘處分似無庸磨勘且處分而後寬免受

恩者止十數人若竟免磨勘則盈千舉子無不蒙

恩敢請推廣

皇仁併免今科磨勘似覺更爲浩蕩臣愚昧之見可否采擇

伏乞

皇上睿鑒施行臣謹

奏

請將八旗壯丁分補綠旗糧缺劄子

奏爲敬陳一得之愚少裨時政事臣竊惟近因雨澤愆期
皇上所夕焦勞下詔求言此誠古帝王應天以質不以文之
盛心也臣再四思維現在政事各已修理惟八旗壯丁
蕃盛所以資其生計尙有宜商酌者敬爲

皇上陳之攷

國初之制滿洲蒙古壯丁滿百卽編一佐領今生齒日蕃
有多至百數十丁者有多至二百丁者若漢軍佐領則
有多至三四百丁者定例滿洲蒙古每佐領額設馬步
甲八十餘名是不得食餉者嘗居其半也漢軍每佐領
止額設馬步甲四十七名是不得食餉者十嘗七八也

合八旗計之不得食餉者不下十餘萬人拘於旗例不能服賈四方欲種田又未必能備牛種資生無策勢所必至

皇上加恩八旗至周至渥復還田宅借給俸餉有加無已其恩所不能及者惟不食俸餉之人查

畿輔五百里內皆八旗之人所得住居之地今八旗兵丁駐防者連水師不過五千六百餘名而綠旗鎮戍之兵自巡捕三營以至撫提二標及天津宣化馬蘭易州等鎮所轄馬步兵共三萬四千餘名若分其半以補八旗壯丁則馬糧一名可養五、六人步糧一名亦可養二、三

人而旗下壯丁無饑寒之憂矣其拔補之法不必驟有更張總俟綠旗兵糧缺出然後將附近居住之旗人頂補三年之內先補旗人三年之後則與綠旗餘丁間補旗人補至十名則設一領催補至五十名則設一驍騎校俱寄統於駐防相近之官補至三百名即可設一防守尉以統之現在福建廣東已經奏准將旗下壯丁頂補綠旗下糧缺福建四百名廣東八百名遵行在案今照此例則近

京入旗壯丁衣食有資雖未能卽補多人而人人知有謀生之路則心志自安似亦修補政事感召天和之一端

也臣愚昧之見可否採擇伏乞

皇上睿鑒施行臣謹

奏

請酌用下第舉人劄子

奏爲請酌揀選下第舉人補用之法以收人材實用事臣

伏見近日吏部議准陝西學臣周爵疏請會試之後揀選下第舉人文理明通者大省四十員中省三十員小省二十員帶領引

見欽定令回本省以學正教諭卽用此誠慎重教職加意作人之雅化也臣竊查向來舉人願就教職者因候選知

縣需次近三十年方可得選而教職則於二十年內便
可得選故安於小就冀得少展生平攻苦之學稍報
朝廷豢養之恩嗣因從前督撫將進士舉人之州縣官才
力不足者

題請教職改用又雍正五年議准湖北學臣于振條奏於
會試後將下第舉人揀選發回各省亦以教職補用以
致從前就教之人俱行壓選現在多有同榜舉人各已
選授知縣而就教之員踰三十年不能得選者若再行
揀發則原候補者益無選期矣伏惟

國家開科取士亦期收人材之用今候選無期似爲可惜

若如學臣所奏實在年老而不勝任者固可叅處勒休
若年雖老而無忝於職任則教職之員固需文藝尤重
老成似未可專尙年力也但旣經議准則此次會試下
第之人或懷報効之心或萌祿養之喜不無觀望查雍
正十一年欽奉

世宗憲皇帝恩旨俯念邊省會試士子路途遙遠
諭令情願小就者許赴挑選引

見欽定揀用知縣多人乾隆元年欽奉

皇上諭旨亦將邊省下第舉人挑選引

見欽定揀用知縣多人臣思親民之官莫如縣令雖係伊等

正選按以科分不無越次未爲小就惟縣丞州判等缺
職務稍輕於舉人班次則爲降選於敎職陞轉亦無甚
別似屬小就請照雍正十一年乾隆元年情願小就之
例將此次下第舉人文理明通年力富強者照議准員
數帶領引

見欽選分發各附近省分以縣丞州判遇缺卽行

題補伊等歷任六年果有賢能出衆政務練習者該督撫
亦照敎職之例保題陞用其先經驗看以知縣註冊之
員遇伊等應選之年仍照例截取各按科分名次以知
縣選用其未及選期有志上進情願會試者仍照在京

典簿司務之例一體准其會試則科分年深久經就教者既不至於壓選而此次揀選人員亦得於小就任內學習政事較練達矣臣言可否採擇恭候

皇上睿鑒施行臣謹

奏